



Број/Број: 01/2а-50-3-2-6/11
Сарајево/Sarajevo: 29.8.2011.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO:	01.09.2011		
Organizaciona jedinica	Klasifikaciona oznaka	Redni broj	Broj priloga

B

Predmet: Zabilješka sa sastanka Kolegija Komisije za vanjske poslove s Ninom Sajić, novoimenovanom ambasadoricom Bosne i Hercegovine u Francuskoj

U srijedu, 27.7.2011., održan je sastanak predsjedavajućeg Komisije za vanjske poslove Mirze Kušljugića, prvog zamjenika predsjedavajućeg Komisije Mladena Bosića i drugog zamjenika predsjedavajućeg Komisije Zvonka Jurišića s Ninom Sajić, novoimenovanom ambasadoricom Bosne i Hercegovine u Francuskoj.

Nina Sajić se na početku zahvalila Kolegiju Komisije za vanjske poslove što su našli mogućnosti da je prime. U svom predstavljanju kazala je da radi već pet godina kao savjetnica za vanjsku politiku zadužena za Evropu, bilateralu i Evropsku uniju člana Predsjedništva BiH iz Republike Srpske Nebojše Radmanovića. Prije toga radila je kratko u Ministarstvu vanjskih poslova BiH, sedam do osam godina u međunarodnim organizacijama i malo u privatnom sektoru. Navela je da je u Francuskoj završila dva postdiplomska studija, jedan iz međunarodnih odnosa i diplomatije a drugi iz strateškog pregovaranja te da uskoro treba da završi doktorat. Prvi strani jezik joj je engleski a drugi francuski.

Kazala je da u Francusku odlazi 22. augusta, da je do 1.8.2011. ambasador u Parizu Almir Šahović, te da je mandat tri godine. Ambasada u Francuskoj bi se u poređenju sa ostalim ambasadama mogla svrstati u kategoriju relativno većih ambasada. Osim ambasadora, tu je još četvoro diplomata a Ambasada nerezidentno pokriva tri zemlje: Alžir, Monako i Andoru, UNESCO, a od skoro i organizaciju Frankofonije jer je BiH od oktobra prošle godine dobila status posmatrača Frankofonije. Neke zemlje kao npr. Crna Gora i Bosna i Hercegovina imaju istog predstavnika i za Francusku bilateralno i za UNESCO, dok većina drugih zemalja iz regije kao što su Srbija, Slovenija i Hrvatska to imaju razdvojeno, kazala je Nina Sajić. Po nekom pravilu, čovjek broj dva u ambasadi je ministar savjetnik, koji je zadužen za UNESCO. Navela je probleme koje smo imali sa Starim mostom i slučajem hotela Ruža u Mostaru, ali da je zadnji izvještaj u vezi s tim bio prilično korektan kao i da je most u Višegradu stavljen na listu UNESCO-a. Dodala je da će tu biti relativno mnogo posla, te da postoji i kandidatura Jajca. Planiran je i jedan regionalni projekat s Crnom Gorom, Srbijom i Hrvatskom gdje je Bosna i Hercegovina organizovala izložbu stećaka sa svih ovih teritorija.

Nina Sajić kazala je da je Francuska imala određenih rezervi kada je bilo pitanje stavljanja Bosne i Hercegovine na bijelu šengensku listu, to je sada prošlo ali će se morati riješiti određena pitanja u vezi sa izdavanjem biometrijskih pasoša u Ambasadi u Francuskoj i u vezi s tim je naglasila da će se zalagati za potpisivanje određenih sporazuma u svom trogodišnjem mandatu. Ono što će biti interesantno za nas, pogotovo u oblasti naučno-tehničke saradnje, jeste učešće u organizaciji Frankofonije čiji smo posmatrač postali prošle godine i tu se otvara mogućnost stipendiranja, gdje je Univerzitet u Sarajevu dao već kotizaciju od 2000

aura. Što se tiče Alžira koji se pokriva nerezidentno, kazala je da je bilo nekoliko pokušaja ekonomske diplomatije i da tu ima mogućnosti za ostvarenje bolje saradnje.

Zvonko Jurišić pitao je kakva je trenutna situacija u vezi sa slučajem hotela Ruža i Starim mostom u Mostaru.

Nina Sajić kazala je da je posljednji izvještaj UNESCO-a relativno pozitivan, gotovo da se i ne spominje hotel Ruža ali da to i dalje ostaje problem.

Mladen Bosić zahvalio se Nini Sajić na dolasku na razgovor s članovima Komisije za vanjske poslove i predložio predsjedavajućem Komisije da se i ubuduće obavljaju razgovori s novoimenovanim ambasadorima.

Merdžana Iglica kazala je da je to praksa i da su novoimenovani ambasadori ranije dolazili u grupama i predstavljali se Komisiji za vanjske poslove.

Mirza Kušljugić zatražio je da se ubuduće obavljaju pojedinačni razgovori s novoimenovanim ambasadorima, što je i dogovoreno kao način razgovora za sljedeće novoimenovane ambasadore.

Mladen Bosić kazao je da smo mi kao Parlament zainteresirani da se uspostavi neki nivo parlamentarne saradnje, s obzirom da je Francuska kolijevka demokratije, te je dodao da očekuje od Nini Sajić da uspostavi kontakt s nadležnom komisijom u Francuskoj s kojom bi uspostavili saradnju.

Nina Sajić kazala je da će biti u kontaktu sa sekretarom Komisije za vanjske poslove Merdžanom Iglicom i u zavisnosti od obaveza članova Komisije možemo planirati određenu posjetu.

Mirza Kušljugić je rekao da nije lako doći do Nikolasa Sarkozyja ili nekih ministara ali da se u direktnim razgovorima s odgovarajućom Komisijom za vanjske poslove Narodne skupštine Republike Francuske neke stvari mogu pokrenuti.


Nina Sajić je istaknula da ambasadori prilikom prijema agremana kod francuskog predsjednika Sarkozyja imaju pet do deset minuta za predstavljanje što je premalo vremena, ali da se na nivou vanjske političkih odbora komisija može uspostaviti određena saradnja, te je dodala da će se truditi koliko je u njenoj moći da se ta saradnja osigura.

Članovi Komisije su na kraju Nini Sajić poželjeli puno uspjeha i sreće u obavljanju dužnosti i kazali da stoje na raspolaganju u svemu u čemu Parlament može pomoći.

Nina Sajić se također još jednom zahvalila članovima Komisije što su u kratkom vremenskom periodu našli vrijeme za ovaj razgovor.

SEKRETAR KOMISIJE

Merdžana Iglica



Dostavljeno:

- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za međunarodne odnose i protokol
- a/a